

von Wulf Wager

I will bloß eikaufa



Bei ons drhoim isch manches andersch als bei andere Paare. I gang zom Beispiel gern eikaufa, während des für mei Frau an Graus isch. I kauf au ihre Klammotta, bzw. i stell se en a Kabine, such raus, was mr gefällt ond des breng i ihra no. Meischt gefällt's au ihra.

Au des, was mr so Alldag braucht kauf i ei. I han do scho raus, was i wo am beschte krieg. I fend jo da ALDI klasse. En koim Lada bisch so schnell durch d' Kass wie dort. Ond mei Lieblingskassierere on i schaffat em-

mer om d' Wette ob sie schneller mit scanna isch, oder i schneller mit eipacka ben. Des isch mei persönliche sportliche Übung äll Woch'. Manchmol muaß i aber au zum REWE oder zom EDEKA, weil i bloß dort spezielle Sacha krieg. Aber Vergnüga isch des kois. Erschtens send die KassiererInna net amol halb scho schnell wie die beim ALDI ond zwoitens muaß i do emmer no über meine persönliche Treue Auskunft geba. Des will i net. Heut morga beim Eikaufa hot mi die Verkäuferin gfrog: "Hend Sia a Playbackkarte?". Wie bitte? Ond nomol: "Hend Sia a Playbackkarte?" "Noi", hane gsait, "i sing meischtens zur Gittarrabegleitung. Playback fend i Betrug am Zuhörer." Näggschde Frog: "Sammlat Sia Treuepunkte?" Dor druf i: "Noi, erschtens ben i au ohne Punkte treu ond zwoitens krieg i dodrfier koin Fremdgehbonus bei meira Frau. Ond jetzt will i zahla!"

I han mir scho a Gegastrategie ibrlegt: Näggschdmol friog i die Kassiererin noch ihrem Kontostand, oder no besser, noch ihrer Körbchengröße. Vielleicht duat se mi no beim näggschda Mol bloß abkassiera, ohne bleede Froga zom stella.

Bis nэгgschd Woch'

Ihr

Wulf Wager